

UPA2020 tikitsinnagu uagut politikerit mingutsitsinnginnerunissamut silallu pissusaanik allannortitsinnginnerusussanik iliuusissatsinnut innersuussisussamik suleqatigiissitamik immikkut ilisimasalinnik inuttalimmik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Innersuussinert tamarmik immikkut imaqqassapput aningaasatigut kingunerusussanik inuiaqatigiinnut aamma innuttaasunut / sullivinnut.

(Inatsisartunut ilaasortaq Steen Lyngé, Demokraatit)

Pillugu

Eqqissimatitsinermut Avatangiisinullu ataatsimiititaliap

Siunnersuutip aappassanneerpeqarnerani

ISUMALIUTISSIISUTAA

Suliarinninnermi ataatsimiititaliap ukuninnga inuttaqarpoq:

Inatsisartunut ilaasortaq Doris J. Jensen, Siumut, siulittaasoq
Inatsisartunut ilaasortaq Aqqa Samuelsen, Inuit Ataqatigiit, Siulittaasup tullia
Inatsisartunut ilaasortaq Nikkulaat Jeremiassen, Siumut
Inatsisartunut ilaasortaq Mikivsuk Thomassen, Inuit Ataqatigiit
Inatsisartunut ilaasortaq Steen Lyngé, Demokraatit

Siunnersuut UPA2019-mi ulloq 7. Maj 2019 siullermeerlugu oqallisigineqarnerata kingorna ataatsimiititaliamit suliarineqarpoq:

1. Siunnersuutip imarisa siunertaalu

UPA2020 tikitsinnagu uagut politikerit mingutsitsinnginnerunissamut silallu pissusaanik allannortitsinnginnerusussanik iliuusissatsinnut innersuussisussamik suleqatigiissitamik immikkut ilisimasalinnik inuttalimmik pilersitseqqullugit Naalakkersuisut peqquneqarnissaat siunnersuuteqartup kissaatigaa. Innersuussinermi aamma inuiaqatigiinnut, innuttaasunut kiisalu suliffeqarfinnut aningaasatigut kingunerisassaannik immikkut ilisimasallit saqqummiussissallutik.

2. Siunnersuutip inatsisartuni siullermeerneqarnera

Partiit amerlanerussuteqartut siunnersuut taperserpaat kiisalu Eqqissisimatitsinermut Avatangiisinullu Ataatsimiititaliamut suliassanngorlugu ingerlatillugu. Partiit ikinnerussuteqartut siunnersuut itigartinneqartussanngortippaat, innersuussutigalugu, pineqartumut Naalakkersuisut suliniuteqarlutik aallartereersimanerat. Naalakkersuisut siunnersuut itigartippaat, innersuussutigalugu piujuaannartitsineq tunngavigalugu nukissanik atuinissamut, imminullu akilersinnaasumik avatangiisinut ineriartortitsinermik suliat aallartinneqareersimammata.

3. Ataatsimiititaliap siunnersuummik suliaqarnera

Partiini amerlanerussuteqarluartut siunnersuut ataatsimiititaliamut suliassanngorlugu innersuuppaat, ikinnerussuteqartullu itigartinneqartussanngortillugu, innersuussutigalugu, Naalakkersuisut mingutsitsissutaanngitsumik ineriartornissamut arlalitsigut suliaqarlutik aallartereersimanerat. Taamatuttaarlu Naalakkersuisut siunnersuut itigartinneqartussanngorlugu innersuuppaat, tunngavilersuutigalugu, piujuaannartitsineq tunngavigalugu nukissanik atuinissamut, imminullu akilersinnaasumik avatangiisinut ineriartortitsinermik suliat aallartinneqareersimammata. Tamanna kommunini kiisalu nuna tamakkerlugu ingerlanneqalereerpoq.

Kalaallit Nunaanni mingutsitsinngitsumik ineriartortitsinissamut ataqatigissumik pilersaaruteqanngitsoq ataatsimiititaliamit maluginiarneqarpoq, taamatuttaarlu inuiaqatigiit, inuttaasut suliffeqarfillu peqataatillugit mingutsitsinngitsumik ineriartortitsinissamut pilersaarummik ataqatigiissumik peqarata.

Immikkut ilisimasallit avataaneersut innersuussutissani tikkuartuisinnaasut pilersinneqarnissaat siunnersuuteqartup kissaatigigaa ataatsimiititaliamit maluginiarneqarpoq. Ataatsimut isigalugu paasissutissat pitsaasut ataatsimiititaliamit ujjartorneqartarput taamaattorli ilisimaaralugu Kalaallit Nunaanni inuiaqatigiinni mingutsitsinnginnissamut, nungukkiartuutaanngitsumik aamma avatangiisinut mingutsitsinnginnissamut ineriartortitsinissamut allannguinnissamullu suleqataasinnaasunik nukissanik piginnaasalinnillu peqartoqartoq.

Avatangiisinut aningaasaateqarfik kiisalu avatangiisinut tunngassuteqartunut suliniutissanut iliuusissanullu aamma taakkua kingunerisaanik isumassarsiornissamut, ilisimasaqalernissamut aningaasalersorneqarnissaannullu periarfissanut ataatsimiititaliaq isumalluarpoq.

Naak tamakku takoqqusaarutigineqanngikkaluartut imaluunniit annertoorsuunngikkaluartut Issittup avannarliup imartaata umiarsuartigut aqqutigineqarnissaa pillugu Naalakkersuisut takorluugaqartut ataatsimiititaliamit paasineqarpoq. Nunarsuarmi sumiiffippassuit assigalugit Naalakkersuisut, assersuutigalugu mingutsitsissutaanngitsumik silaannakkut angallannermut ersarissumik suliniuteqaratillu pingaarnersiuiinngillat.

Nammineq qanoq iliornissarput pingaartikkutsigu aammalu nammineq piginnaassutsitta atornissaa, sapinngisatta atornissaa pingaartikkutsigit kiisalu avatangiisinut paarsinissaq aamma silaannaap allanngoriartorneranut akiuunniarneq pingaartikkutsigit siunnersuut manna qanorluunniit naalakkersuinikkut inernejassagaluarpat taava ataatsimiititaliamit innersuussutigineqassaaq, nungukkiartuutaanngitsumik inuuneqalernissamut, mingutsitsinnginnerunissamut silaannaallu pitsaanerumik atorneqarnissaanut Naalakkersuisut naalakkersuinermi suliniuteqarnermi piumassuseqarnerullutillu ersarinnerussasut.

4. Siunnersuutip aningaasatigut kingunissai

Inatsisartut suleriaasianni § 33. Imm. 1-mi allassimavoq aalajangiiffigisassatut siunnersuutip piviusunngortinneqarnerani aningaasatigut kinguneritinneqartussat siunnersuutip tunngavilersuutaanut ilanngullugit allassimassasut.

Siunnersuutip piviusunngortinneqarnerani aningaasatigut kinguneritinneqartussat siunnersuummut ilanngunneqarsimasut ataatsimiititaliamit maluginiarneqarpoq, tassa immikkut ilisimasallit sulinerannut aningaasartuuteqartoqassasoq. Naatsorsuutigineqarpoq atorfilittap ukioq ataaseq sulinera qaangernagu aningaasartuutigineqassasut.

5. Ataatsimiititaliap inassuteqaatai

Ataatsimiititaliami amerlanerussuteqartut Inuit Ataqtigiit aamma Demokratit tamanna tunngavigalugu siunnersuut **akuerisassanngortippaat.**

Ataatsimiititaliami **ikinnerussuteqartut** Siumut siunnersuut pillugu ima oqaaseqassapput: Ataatsimiititaliami ikinnerussuteqartut, Siumut oqaaseqaataat: Siumut ikinnerussuteqarlutik tunngavisusumik siunnersuut isumaqataaffigaarput. Taamattorli Siumumit isumaqataaffinngilarput Naalakkersuisut sulianik arlalinnik allartitserersimasut ingerlataqalereersimasullu, qaavatigut immikkut ittunik ilisimasalinnik pilersitsinissaanik siunnersuuteqartup tunngavilersuummini anguniarmagu. Taamaammatt siunnersuut taamatut isikkoqartillgu Siumumiit akuersaanngilarput.

Ataatsimiititaliami ikinnerussuteqartut Siumut tamanna tunngavigalugu siunnersuut **itigartinneqartussanngortippaat.**


Taamatut oqaaseqarluni siunnersuummilu allassimasutut paasinnilluni matumuuna ataatsimiititaliap siunnersuut aappassaanniigassanngortippaa.



Aqqa Samuelsen
Siulittaasup tullia




Doris J. Jensen
Siulittaasoq



Nikkulaat Jeremiassen



Mikivsuk Thomassen



Steen Lynge